

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 100398 24 K
Visoko,23.04.2024.godine

U IME FEDERACIJE BOSNE I HERCEGOVINE

Općinski sud u Visokom, po sudiji Avdiji Avdić uz sudjelovanje zapisničara Sejdić Džemile, u krivičnom predmetu protiv optuženog H.A.sin I. iz V., zbog krivičnog djela nasilje u porodici iz člana 222. stav 4, u vezi sa stavom 1 KZ FBiH , rješavajući po optužnici Kantonalnog tužilaštva-tužiteljstva Zeničko-dobojskog kantona broj T 04 0 KT 0053148 23 od 25.12.2023.godine , nakon zaključenog glavnog javnog pretresa, održanog dana 23.04.2024.godine u prisustvu Kantonalnog tužitelja Sikira Ešrefa, optuženog H.A., na pretresu za objavljivanje presude, u prisustvu kantonalnog tužitelja i optuženog, dana 23.04.2024.godine, donio je i javno objavio :

PRESUDU

OPTUŽENI: H.A., sin I. i majke S. rođ. A., rođen 03.01.1988. godine u V., gdje je i nastanjen na adresi H. broj ..., pismen, sa završenom srednjom školom, po zanimanju elektrotehničar, razveden, otac jednog mlđb. djeteta, zaposlen u S. restoran „I.-T“, po narodnosti Bošnjak, državljanin BiH, JMB: ..., neosuđivan,

KRIV JE

što je,

dana 08.05.2023. godine oko 20,00 sati, u V., nasiljem, drskim i bezobzirnim ponašanjem ugrozio mir, tjelesnu cjelovitost i psihičko zdravlje člana svoje porodice, Mlđb.1. sina, na način da je, a nakon što je Mlđb.1. rekao da ne želi noćiti kod njega u kući na adresi H. broj ... i da želi da prespava kod majke Š.A. na adresu G.R. broj ..., istome zaprijetio da ne smije govoriti da ne želi prenoćiti kod njega u kući i naredio da prespava u njegovoj kući, zbog čega je Mlđb.1. udario šamarom u lijevu stranu lica, zatim sa obje ruke uhvatio za potiljačni dio vrata i snažno bacio na krevet, iako je znao i bio svjestan da fizičkim napadom i vrijeđanjem ugrožava spokojstvo, tjelesni integritet i duševno zdravlje člana svoje porodice, što je i htio, nakon čega je Mlđb.1. putem telefona pozvao svoju majku Š.A. koja je istog odvela u JU „Dom zdravlja Visoko“ gdje su djetetu konstatovane povrede na koži vrata sa stražnje strane na dva mjesta od po cca 2-3 cm,

dakle, nasiljem, bezobzirnim i drskim ponašanjem ugrozio mir, tjelesnu cjelovitost i psihičko zdravlje članova svoje porodice,

čime je počinio krivično djelo Nasilje u porodici iz člana 222. stav 4., u vezi sa stavom 1. KZ F BiH.

Pa sud optuženom na osnovu istog zakonskog propisa: te na osnovu članova: 42., 49. i 62. KZ FBiH, i z r i č e

USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 1(jedne)godine , a koja se neće izvršiti ako optuženi za vrijeme od 1(jedne)godine ne počini novo krivično djelo.

Na osnovu člana 202 stav 1 u vezi sa članom 199. stav 2. tačka g) ZKP FBiH, optuženi je dužan platiti sudu na ime troškova krivičnog postupka u vidu paušala 20,00 KM, sve u roku od 30 dana, po pravosnažnosti presude pod prijetnjom izvršenja.

Objašnjenje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom broj T 04 0 KT 0053148 23 od 25.12.2023.godine , optužilo je H.A., zbog krivičnog djela Nasilje u porodici iz člana 222. stav 4., u vezi sa stavom 1. KZ F BiH, (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), (dalje u tekstu KZ FBiH).

Optužnica je potvrđena od strane sudije za prethodno saslušanje ovog suda dana : 28.12.2023.godine. Dana 22.02.2024.godine na ročištu o izjašnjenju o krivnji, optuženi H.A. je izjavio da nije kriv za krivično djelo koje mu se stavlja na teret.

Na glavnom pretresu održanom 23.04.2024.godine prije izvođenja dokaza, optuženi H.A. priznao je krivično djelo Nasilje u porodici iz člana 222. stav 4., u vezi sa stavom 1. KZ F BiH , a njegovo priznanje je prema ocjeni ovog suda u saglasnosti sa dokazima u koje je sud izvršio uvid i to: -Zapisnik o ispitivanju osumnjičenog H.A., PS Visoko broj: 08-02-09/1-379/23 od 08.05.2023. godine, - Zapisnik o saslušanju svjedoka-oštećenog mlđb.1. , KT ZDK Zenica od 13.10.2023. godine, uz priložen transkript i DVD sa video zapisom saslušanja,-Zapisnici o saslušanju svjedoka-oštećene Š.A. PS Visoko broj: 08-02-09/1-377/23 od 08.05.2023. godine i ovog Tužilaštva od 13.10.2023. godine,-Zapisnik o uviđaju PS Visoko broj 08-02-09/1-111/23 od 08.05.2023. godine,-Specijalistički nalaz JU „Dom zdravlja Visoko“ na ime Mlđb.1. od 08.05.2023. godine,-Rješenje Općinskog suda u Visokom broj: 41 0 Pr 097536 23 Pr od 09.05.2023. godine, -Akt PS Visoko broj: 08-02-09/1-03-2-6576-1/23 od 12.12.2023.godine, zajedno sa CD-om sa fotografijama.-Izvod iz kaznene evidencije za osumnjičenog H.A., PS Visoko broj: 08-02-09/1-interno/23 od 10.05.2023. godine,

Optuženi u završnoj riječi izjavio: žao mi je što se to sve desilo, međutim, to je samo bila kulminacija dosadašnjih dešavanja sa mojom bivšom suprugom koja je našla momka, pa je bilo problema oko viđanja djeteta, takođe je bilo problema oko plaćanja alimentacije, koju sam uredno plaćao , međutim davao sam svojoj bivšoj supruzi na ruke, nisam preko računa, te sam ponovo u sudskom postupku morao sve to platiti. Alimentaciju za dijete uvijek sam plaćao i danas dan plaćam, i to ne smatram kao obavezu, već kao svoju dužnost kao otac svog djeteta. Dijete je bilo pod uticajem svoje majke koja ga je odvrćala od mene tako je bilo u tu noć. Poslije ovog događaja majka djeteta se udala i dijete je kod mene i ja vodim brigu o njemu, vodim ga u vrtić, izdržavam, a i dalje plaćam alimentaciju. Molim sud da ovo uzme u obzir prilikom izricanja sankcije , jer je to bio sve splet nesretnih okolnosti , a zadnje što bih uradio na svijetu i svom životu je da povrijedim svoje dijete, jer njega jedino imam. Nemam ni oca ni majku. Svaka sankcija koja bi uključivala zatvor bi onemogućila da izdržavam i sebe i dijete i da vodim brigu o njemu , jer njegova majka više nije sa njim. Dijete je kod mene.

Sud je ovo priznanje krivnje optuženog ocijenio kao jasno, iskreno i nedvosmisleno ničim uslovljeno tako da je priznanje optuženog u saglasnosti sa materijalnim dokazima, naprijed navedenim, u koje je sud izvršio uvid, na osnovu čega van svake sumnje proističe da je

optuženi ostvario sva bitna obilježja bića krivičnog djela koje im se stavlja na teret Nasilje u porodici iz člana 222. stav 4., u vezi sa stavom 1. KZ F BiH,

Po ocjeni suda optuženi je navedeno predmetno krivično djelo učinio sa direktnim umišljajem jer je bio svjestan svog djela i htio njegovo izvršenje, a sud je utvrdio da je optuženi prilikom izvršenja krivičnog djela bio uračunljiv, jer predočenim dokazima nije dovedena u sumnju mogućnost optuženog da shvati značaj svog djela i da upravlja svojim postupcima u vrijeme izvršenja djela, te su se u njegovim radnjama stekla sva bitna obilježja bića krivičnog djela nasilje u porodici iz člana 222. stav 4., u vezi sa stavom 1. KZ F BiH,

Prilikom izricanja krivično pravne sankcije sud je cijenio optuženom H.A. kao olakšavajuće okolnosti činjenicu da je priznao izvršenje krivičnog djela koje mu se stavlja na teret, čime je u mnogome doprinio utvrđivanju činjeničnog stanja i skraćenju krivičnog postupka, kao i okolnosti koje je optuženi naveo u svom iskazu prilikom priznanja krivnje, te činjenicu da optuženi do sada nije ranije osuđivani. Dok je od otežavajućih okolnosti sud uzeo u obzir samu prirodu i vrstu krivičnih djela koja mu se stavljaju na teret. Cijeneći utvrđene okolnosti na strani optuženog, sud je optuženom H.A., za navedeno krivično djelo utvrdio kaznu zatvora u trajanju od 1(jedne)godine, koja kazna se neće izvršiti ako optuženi u roku od 1(jedne)godine ne počini novo krivično djelo. Po mišljenju ovog suda izrečena sankcija srazmjerna je stepenu odgovornosti optuženog i težini počinjenog krivičnog djela koje mu se stavlja na teret, te će se istom postići svrha kažnjavanja, kako sa aspekta generalne, tako i specijalne prevencije predviđena članom 42. KZ FBiH.

Na osnovu člana 202 stav 1 u vezi sa članom 199. stav 2. tačka g) ZKP FBiH, optuženi je dužan platiti sudu na ime troškova krivičnog postupka u vidu paušala 20,00 KM, sve u roku od 30 dana, po pravosnažnosti presude pod prijetnjom izvršenja.

Sudija
Avdija Avdić

PRAVNA POUKA:

Protiv ove presude dozvoljena je žalba Kantonalnom sudu Zenica u roku od 15 dana po prijemu iste, a žalba se podnosi ovom sudu u tri primjerka.